

Boa tarde,

Uluk-nanain, ha'u hakarak hatoo ha'u-nia sinserus respeitus ba:

1. Sua Exelénsia, Primeiru-Ministru Taur Matan Ruak
2. Sua Exelénsia, Tenente-Jenerál Lere Anan Timur
3. Sua Exelénsia, Vise-Ministru Interiór António Armindo
4. Sua Exelénsia, Ministru Transporte no Komunikasoins José Agustinho da Silva
5. Sua Exelénsia, Prezidente Autoridade Munisípiu Baucau Olivio Freitas
6. Vise-Ministru Negósius Estranjeirus no Kooperasaun Julião da Silva

Ha'u agradese tebes ita-boot sira mai-hamutuk ona iha ne'e hodi marka inísiu ofisiál husi ita-nia reabilitasaun konjunta ba Aeroportu Baucau.

Ha'u hatoo ha'u-nia agradesimentu espesiál ba Sua Exelénsia Primeiru-Ministru tanba mai-hamutuk ho ita ohin iha Baucau. Ita-hotu iha ne'e ohin tanba ita-boot nia apoiu makaas no firme ba projetu ne'e.

Projetu ida-ne'e kleur ona maka sai nu'udar vizaun Governu Timor-Leste nian, liuliu Sua Exelénsia Primeiru Ministru nian, no Estadus Unidus sente orgullu halo parseria ho ita-boot sira iha áreas seguransa no dezenvolvimentu ekonómiku.

Ha'u kontente ita halao seremónia lansamentu primeira-pedra iha sinál ida-ne'e. Ha'u gosta sinál ne'e. Ba ha'u, ne'e símbolu simples ida husi Timor-Leste nia soberania.

Sinál ne'e – hanesan mós ho pista ne'e – funsiona hela, no presiza deit maka atualiza hodi nune'e bele funsiona plenamente. Sinál ne'e halo klaru katak aeroportu ida-ne'e Timor-Leste maka operasionaliza, agora no para sempre.

Iha pasadu, ha'u hetan ona oportunidade halo vizita mai iha Aeroportu ne'e ho membru-sira husi AACTL, no poténsia hodi haluan liután utilizasaun ba fatin ne'e sai klaru dunik. Komponente Áerea F-FDTL ida ne'ebé kapasitadu ho di'ak hodi bele opera husi Baucau sei sai impulsu boot ba Governu nia kapasidade hodi kontrola no proteje Timor-Leste nia soberania no interesses ekonómikus no serbi povu Timor-Leste.

Iha fulan Outubru tinan ne'e, ekipa enjeñaria konjunta ida husi F-FDTL no militár Estadus Unidus nian sei hahú hadi'a lutu perímetru, no halo konstrusaun projetu sira iha Aeroportu ida-ne'e. Sei konstrui uluk armazen ida ba ekipamentu hodi rai veíkulu apoiu-sira ba Aeroportu maka hanesan kamiaun combustível no bombeiru ida, hamutuk ho veíkulu hamoos pista no ekipamentu seluk tan.

Ekipamentu ne'e sei diretamente apoia F-FDTL nia kapasidade hodi operasionaliza no mantein ninia aviaun vizilânsia foun Cessna 206 ne'ebé sei too mai iha tinan ne'e nia rohan, no iha mós poténsia klaru hodi apoia aviasaun sivil iha Baucau ne'e.

Projetu kiik hirak ne'e bele reprezenta inísiu husi Estadus Unidus nia asisténsia adisionál. Ami oferece ona hodi konstrui armazen ida ba asisténsia umanitária no ajuda iha dizastre, nomós instala iluminasaun pista nian ne'ebé sei apoia utilizasaun 24-oras ba Aeroportu, no poténsia mellorias seluk tan ba Aeroportu ne'e.

Hamutuk, projetu hirak ne'e importante tebes atu realiza Timor-Leste nia mehi boot hodi reabilita aeroporto importante ida-ne'e, expande liután kapasidade F-FDTL nian no ajénsia protesaun sivil-sira, nomós apoia dezenvolvimentu ekonómiku no diversifikasiasaun iha parte krusiál husi NASAUN ne'e nian.

Kapasidade governu Estadus Unidus – no povu Amerikanu – hodi apoia Timor-Leste iha reabilitasaun konjunta ida-ne'e halo sai posível husi *The Status of Forces Agreement* entre ita-nia NASAUN RUA. Akordu ne'e, asina iha tinan 2002, possilita asisténsia seguransa hanesan ne'e, nomós ezersísiu militár-sira, treinamentu ba pesoàl F-FDTL, no Naval Seabees nia prestasaun servisu liu tinan 10 ona, sira-nia projetu ba dala 102 ha'u ajuda inagura ohin dader iha eskola EBC Seical ho Ministru Edukasaun.

Atu konklui, ha'u hakarak hatoo ha'u-nia agradesimentu sinseru ho laran-tomak ba Sua Exelénsia Primeiru Ministru Taur Matan Ruak; Vise-Primeiru Ministru José dos Reis, Ministru Filomeno, Tenente-Jenerál Lere; no autoridades aviasaun sivil ba ita-boot sira-nia apoiu kontínuu ba projetu ida-ne'e. Ha'u hein ba oin futura kolaborasaun entre governu no povu husi ita-nia NASAUN ne'e.

Obrigadu barak.